

Jaarverslag VVDS 2021-2022

Ut jaor van:

- Vur den derde kier Prins Fabian d'n urste en Prinses Lonneke
- Jeugdnar Mark en Jeugdnarrin Lotte
- Ut jaor dat we wer alle daag mooge, en un enkeling van os zellufs twië kier per dag
- Ut jaor dat hallef afgelast is, mar uiteindeluk ok dubbel zo hard gevierd
- Ut jaor dat we der achter kwame dat ge nie perse altied um 5 uur 's naachts naor huus hoeft, 5 uur 's middags kan ok
- Ut jaor dat Han wer grei het gesloopt
- Ut jaor van de tusse neus en lippe dur medailles uutreike
- Ut jaor dat alles un klèn bitje duurder was: De munte, de brunch, zellufs Ten Duijf hiet vort Eleven Duijf.
- En wer ut jaor van unne biezonndere, mar wel unne fantastische vastelaovend

Ut bestuur bestoond uut:

- Vurzitter Robert Steeghs
- Vorst Jop Loonen
- Penningmèster Stijn Nelissen
- Sik Sander Peeters

En de bestuursleje . . . Han van de Sande, Rob Kunkeler, beide aftrejend, en Marc van de Ven, en aspirant bestuursleje Toffel Gommans en Daan Willems

De Raod van Elluf bestoond dit jaor uut:

Pascal Classens, Fred Peeters, Roel Steeghs, Marc Steeghs, Paul Geurts, Wilbert Steeghs, Joep Willems en Willem Lemmen

De dansmariekes ware: Renske Zanders, Judith Steeghs, Linda Willemsen en Amber Brugmans

11-11:

Ut seizoen begos net as vurrig jaor mit ut afluase van 11-11. Gen uutgestelde jaorvergadering, gen mök ienzègene, gen pilske pakke en bejbuurte.

Ok de zaoterdag dernao is ut vorsteraodsbal wer afgelast. Ut was genne fantastischen aovend mit gen band en gen moj fiëst dernao. Wel goeikoëp.

We skippe efkes dur naor 9 jannewarie, anders wert ut toch nog un jaarverslag van 8 pagina's.

9 jannewarie zeuj eigeluk de prinseproclamatie zien, mar helaas, die mosse we ok afluase. Wel hebbe we un online persconferentie gehalde. Vorst Jop en minister van Flauwekul Willem hebbe de maatregale besproke, en uiteindeluk het Paul as viroloog ok nog tekst en uitleg gegève over ut iën en ander. Ok hebbe we toen bekend gemakt dat Prins Fabian en Prinses Lonneke vur hun derde jaor dur gaon, en nao wat flauwekulle en kwatse, kreeg hej uiteindeluk de jaormedaille. Ok moog Oeldere mitdènke over unne neje liefspreuk.

Ien ut kort:

- Fabian en Lonneke gaon nog un jaor dur
- Gen ald wieverbal
- Genne JVV-aovend
- Gen prinsereceptie
- Genne bonte aovend, den wier online
- Gen André Hazes ien de kroeg, aldus de viroloog

We slaon dus unne hoëp aover, tot **5 fibbrewarie, de online Bonte Aovend**.

Dit jaor ware d'r ok wer pakkette gemakt mit van allerlei versnaperinge, alliën koste dees dit jaor ophale op ut dörpsplein, same mit ow muts en wante, tenminste as ge lid wart. Ut was bèst unne gezellige middag bej d'n Drive Tru, wel un bitje kald, mar de sfeer zaat d'r alvast ien.

Dizze twedde online Bonte Aovend haaj eigeluk noëit plats motte viende, mar umdat wej tiejes de vurbereiding nog nie wisse of ut ien de zaal dur kos gaon, hebbe we ut toch ma zoë gedaon. En ut was èvegoed unne mojje aovend, mit Prins Fabian, Prinses Lonneke en Vorst Jop die de stukke ankondigde en de bingo prizzentierde. 11 van de bèste Bonte Aovend-stukke van Oelderse bojjem van de afgeloëpe 20 jaor wiere nog es unne kier afgespuld, en ut was hartstikke moj um dees wer es unne kier terug te zien. Toch hope wej dat dit toch de lèste online Bonte Aovend was, en wej de kommende jaore wer gewoën ien de zaal kunne zitte. Urges halleverwege ut programma kreges we ok nog hoëg bezuuk, van de vorstenraad. Rob, Rob, en Arno kwame vur Rob, en Robert was d'r ok. Rob Kunkeler was d'r nameluk 11 jaor bej, en daorum het hej un onderscheiding gekrege: De orde van de vorsteraad en de orde van de zilvere Spurriemök. Uiteraard kreeg hej ok un bluumpke, en dat het hej vakkundig ien de hand van Pamela geflikkerd. Hej was bèst blie mit zien onderscheidinge, en haaj ut ok nie den aovend verwaacht.

Nao dizze aovend han we os pak alwer bijna ien de kast hange, mar toen ienèns kwaam versoepeling op versoepeling, en bleek dat wej hiël, hiël drej wer an de geng mosse um toch unne vastelaovend te gaon organisiere.

Hals over kop zien d'r commissies opgericht, stad en land zien afgebeld um bands en DJ's te regele, nog snel wat stukskes geschreve, posters gemakt, want krap twië-en-un-halleve wèk lätter was ut al zowiet: Vastelaovend 2022.

Mar urst, op **12 fibbrewarie**, was ut tied vur un spel wat nao al die jaore terug was van weg gewist, althans, vur volwassene: Expeditie Mök, bèter bekend as: k*tspel. Ien ut kort: Verschillende aovende struine dur de struuk, rondjage mit d'n auto, beke uitkamme, um d'r vervolleges achter te komme dat d'n tip nurges op sloeg.

Mar eigeluk was ut toch ok wel wer leuk. De organisatie en diëlnemers hebbe d'r ien ieder geval veul tied ien gestoke, en ok andere lichaamsdiële.

Un wèk lätter was vur un zeer select gezelschap nog de finale van ut LVK. Daor wonne Bjorn en Mieke mit Altied ope.

Zaoterdag **19 fibbrewarie** was de krantverkoëp. Dit jaor stonde Gerrit en Paula op de vurkant, en ok hebbe ze un groët interview gegève. De commissie was ien ieder geval tot diep ien de naacht bezig mit ut afneme van dat interview. Mar umdat ze d'r zelluf op stonde, mooge ze um ok zelluf onthulle en ien ontvangst neme. Daornao wier ie ok wer moj dur hiël Oeldere verspreid.

De wèk van de vastelaovend begos op **donderdag 24 fibbrewarie**, waar we wer efkes un training kregre ien ut overlève ien de Sahara den de Liende hiet. Bej hoëge uitzondering werkte de verwèrming ien de Liende nie goed, en was ut ongeveer 35 graode ien de soos, en koste un ei bakke op ut podium. Al mit al was ut wel gezellig, en ware we eigeluk zoë wer gewend an os pak, en polonaises loëpe.

Vrejdag 25 fibbrewarie was de schólcarnaval. Dit jaor was ut wer ien Oeldere. De schól haaj unne optocht georganiseerd, mit verkiersregelaars, en daornao un programma ien de Liende. Naodat alle hoëghede efkes gespeched han was ut tied vur wat polonaises, un aantal optrejes, en uiteindeluk kreeg iederiën nog un presentje.

Nao de schólcarnaval werre d'r normaal gesproke nog iën of twië pilskes gedronke ien d'n Terp. Fabian, d'r werre dan normaal gesproke nog ien of twië pilskes gedronke ien d'n Terp. Vorst Jop was vrej verstandig en ging op tied naor huus, oftewel den mos mök zuuke, en toen den 's aoves de prins en prinses tege kwaam vroeg hej nog: Enne, nog veul gezope? Mar dat fielalemoleikwelmid, zei Fabian. Op ut end van den aovend was expedisie mök ok afgeloëpe, en ware we allemaal benejd wie d'r gewonne haaj.

Daags dernao, op **zaoterdag 26 fibbrewarie** ging ut dan echt beginne. 's Merges wier alles vur d'n dag gehald, en ien ut begin van den middag zien Prins, Prinses en Vorst op bezuuk gewist bej ut klènste mökske, want Kevin en Elle han unne klène Kooter, ehm, Kevin en Elle Kooter han unne klène, genaamd Roxy. Umdat ze zo positief ware hebbe we op un afstand ut klènste mökske ien den tuin gezet, ma nie zonder de medaille en un doës chocola af te gève. Nieje, gen bloeme, want ge brengt ok genne friet naor Gerrit en Paula.

Rond un uur of 3 ien de middag wier ien den Terp verzameld um ut seizoen te opene. Nao un kort woordje van de vorst en ut uitreike van medailles ginge we mit zien alle naor buute. Daar stond keurig netjes alles klaor um de mök ien te zègene. Toen we deraachter ware dat we dan andere jaore toch nie mit spej hebbe gedaon en ut wijwater ok anwezig was kosse we moj de mök ienzègene. Daornao nog ekkes un pilske ien d'n Terp, um vervolleges um un uur of 7 ien de Liende te zien vur ut Expedisie Mökkebal. Achteraf gezien han we eik bèst wel un uurke látter doorhin kunne gaon, mar uiteindeluk begos de band Sjanté en wier ut hartstikke gezellig. Ien de pauze hebbe we nog unne kier de meense iengezègend die d'r 's middags nie bej ware, un aantal medailles um- en opgehange, en de priesuitreiking gehad van Expedisie Mök. De winnaars ware de Terpmökke. Toen iederiën zien zegje haaj gedaon kwaam Sjanté de buhne wer op en die hebbe ut feestje vur den aovend afgemakt. An ut eind van de aovend kos iederiën den dat woj un lekker eike ète, en as ge dat nie waot dan koste ut gewoën terug ut bakhok ien flikkere.

Zondag 27 fibbrewarie was ut Narrebal, of Narnaval, of toch de Narreproclamasie?

Ien ieder geval, ut was groët geheim dat d'r narren uut zun komme. Ut was eigeluk gewoën un klène prinseproclamasie. Ut decor was ien korte tied toch bèst wel moj geworre, en mar goed dat wej un paar mèter papier extra hebbe besteld, want dat decor haaj de schóljeugd alwer vakkundig gesloopt op de vrejdag. Vorst Jop haaj un verhaal over dat ut belangeriekste virus nou ut vastelaovesvirus is, en dat ut eigeluk wel moj is as Prins Fabian en Prinses Lonneke same mit de jeugd op kan trekke, mit as hoëfdpersoëne degene die de allerergste variant han. Nao un

paar tests mit ut publiek kwame de 11 regels, en toen kwame Jeugdnar Mark en Jeugdarrin Lotte dwars dur den achterwand. Uiteraard stond ok wer ut confettikanon klaor, en Erik Loone vond dat den confetti mar pien deuj. Toen ze allebei gespeched han kos de hiële jeugdraod ien de nek, en ging ut fiëst moj verder.

Dit ging uiteraard hartstikke goed mit artieste as Steriele Ger en Knolbeat, die naodat we ze goulash han gevoerd, ok nog ekkes mit os naor de soos ginge. Daor hebbe Daan en Toffel ok nog ekkes Daan zien prinsenummer gezonge, althans, ut refrein ging best goed. Daornao natuurluk naor d'n Terp, waar d'n dag moj afgelote wier. Uiteraard wier d'r ok wer druk gelobbyd vur neje raodsleje. Naoderhand wiere d'r nog eier gegète bej Pouwl en Mel, mar umdat zej 6 eier han vur 15 man, schote de prins en prinses te hulp, die volgens mej altied gewoën wél 100 eier op vurraad hebbe.

Maondag 28 fibbrewarie, was 's merges ut snotneuzebal. De allerklènste han de vloer, en ut was te zien dat unne hoëp papa's en mama's zich ut afgeloëpe jaor nie vervèld han.

Um 1 uur begos ut Megapark Carnavals Edisie. Dit was misschien wel un beetje an de vroege kant, toch was Aostrum d'r al vurdad de mèste van os eige raod d'r ware. Dizze middag han we un goeie band: Richtig Spiet. Ut fiëst was metiën an de geng. OK haaj de commissie vur dizze middag dranktorens geregeld, die ge naor wens kost laote vulle mit bier, wodka lemon of bacardi cola. Misschien was ut verstandig gewist um de mixdrank ekkes te pruuve vurdad ze verkocht wiere, ien plats van toen de urste meense um begosse te kiepe. 1 op 3 mixe was misschien net iets teveul, mar bej de twedde lading Wodka ging ut al bèter. Gelukkig dat bej sommige torens de helft d'r al uut gelekt was, anders ware d'r sommige meense nog zatter gewist. Uuteindeluk was de band un succes, d'n umzet was ok goed, en de middag was hartstikke gezellig. Uiteraard kosse de kleptoklingels ut wer nie laote um os vlagge mit te neme, en ze waon unne BBQ um ze terug te kriegen. We hebbe ze un tikkie gestuurd. Umdat wej gen ète han, ginge we ekkes vur 20 man friet en snacks hale bej den Terp. Helaas kosse we de friet nie viende, mar uuteindeluk han we toch net zat gekrege um de soos te overlève. Daornao naor d'n Terp waar ut nog best gezellig was, en Han ut nie kos laote um wer mit dat glazespuulding te rotzooie. Judith Bardoel wier d'r ien ieder geval wel nat van. Ok het hej nog efkes kunne oefene mit glas opruume. Zien moeder zei nog, doe da nou nie, ma hej deej ut toch. Uiteraard nao d'n terp wer eier ète, dit kier wer bej de prins en prinses. Daags dernao han sommige meense wat extra wèrk mit hun bed, hun wc, de gordiene of zichzelluf schönmake.

Dinsdag 1 márt begosse we mit ut repariere van den ketel, althans ozze prins wel. Vur degene die mier geluk han haaj Paula wer balle gedrèjd en vlejs gebraoje, want ut was tied vur d'n brunch. Uiteraard krege Gerrit en Paula dan ok wer unne medaille. Toen we allemaal ut witte strikske wer an han (want wie duut d'r nou un roëj-gèl-gruun strikske an) ginge we naor de Liende vur de alternatieve BBZ, oh nieje, ut Spurriefest. Daor han wej, ien plats van allemaal artieste uut eige dörp, allemaal buutedörpse artieste gevraagd. Ut was nie gek druk, mar toch mieke Nevvenèn, Maik en Kyra, en Pruuf mar d'r un moj fiëstje van. Ok het Frank Steegs as de anonieme reporter de meense van den ennigste live-buut van ut jaor vurzien. Wej han ok unne DJ, den de kiender wer goed vermiek umdat hej de halleve action leeg haaj gekocht. An ut end van de middag wier de jeugdcarnaval ien de Liende geslote mit speches van de beide narre, en

uiteraard ware d'r ok wer hamburgers te ète. Toen nog ekkes ut lèste pilske mit Math en Wilma, en wer mit z'n alle naor d'n Terp.

Ietskes ieder ginge we mit un delegasie naor de soos, umdat GoedZat daor op zeuj treje. Gelukkig dun ze hunne naam wel ier an. Ze ware goed zat mar de zang was nog wel net Goed zat. Ze hebbe daornao ok nog ekkes ien d'n Terp gestaon, vur un man of 20, mar dat zulle ze zelluf misschien wel ga nie mer wiëte.

Ien de soos wier d'r nog iëne kier gespeeched, d'r wiere twië medailles opgehange, en nog un groepsfoto gemakt. Daornao naor buute en de jeugdmök ging ien de hens. Vastelaovend 2022 was vur de jeugd ten einde gekomme.

Daornao mit de delegatie, unne hoëp elders, en stiekem ok nog wel un del soosjeugd, terug naor d'n Terp. D'n DJ was mitverhuusd, tot groët genoeg van Pouwl. Tigge 12 uur was ut tied vur nog un paar medailles, Gerrit en Paula nog unne kier extra bedanke, Han het nog un bluumpke an Paula gegove vur alles wat hej gesloopt haaj, en daornao was de afsluutende speech van Prins Fabian. Daornao naor buute en de mök ien de fik stèke. Iënmaol binne wier de tent wer figuurluk op de kop gezet, en nao un paar uur vond den DJ ut moj gewist. Ozze vorst het nog ekkes durgedrèjd, Pouwl het nog ekkes den DJ bedankt vur zien goeie zörg, mar nao iets mit unne prullebak vond Paula ut moj gewist. De muziek ging uut, mar dat weerhield Mark d'r nie van um nog un kleine serenade te gève, waar zellufs Paula nog hiël ekkes um mos lache. Toen het ze iederiën deruut gevègd, sommige wakker gemakt, en toen de deur snel op slot vurdat vorst Jop ziene jas haaj, terwiel den eik alliën mar an ut hellepe was.

Uiteraard wier trouwes de nacht afgeslote op de alde vertrouwde manier: Eier ète bej de Prins en Prinses tuus.

Aswoensdag 2 márt, was ut net zoëas anders altied mit zien alle opruume.

Sommige meense vuulde zich nie zo lekker, mar de mèste toënde toch ruggegraot. Daornao lekkere soep mit hamburgers gegète bej de prins en prinses, 's aoves ut assekruuske en daornao herringschelle ien d'n terp. We kunne wer terugkieke op unne biezondere, mar wel wer èrg goeie vastelaovend.

Dit was ut jaorverslag van seizoen 2021-2022